



https://www.go-to-the-future.eu/Modules/fiches/images/logo-pdf.jpg

Image not found

https://www.go-to-the-future.eu/Fichiers/fiches/medium/171607skye.jpg

## Taighean-Solais

### 5 - Eachdraidh - Eachdraidh

Chaidh a' chiad taigh-solais ann an Alba a thogail air Eilean Mhàigh ann an Linne Foirthe, ann am meadhan na 17mh linn, agus b' e teine guail a bha ga chumail a' dol.

**Bhon uair sin, chaidh na ceudan de sholais a chur mu thimcheall oirthir na h Alba airson maraichean a threòrachadh tro uisgeachan cunnartach.** Chaidh Bòrd nan Taighean-solais mu Thuath a stèidheachadh ann an 1798 agus tha e a-nis a' ruith 206 taigh-solais, còmhla ri putaichean, leòis-mhara is stèiseanan eile.

**Tha eachdraidh inntinneach aig Bòrd nan Taighean-solais mu Thuath (BTT).** Bha an teaghlach Stevenson ainmeil mar innleadairean agus b' iadsan a dhealbhaich na taighean-solais thairis air ceithir ginealaichean. Thòisich an obair seo le Tòmas Mac a' Ghobhainn, agus b' ann airson a bha an t-uallach airson a' chiad taigh-solais le BTT aig Rubha a' Chinn-àird ann an 1787. An ceann deich bliadhna, bha a leas-mhac, Raibeart Stevenson, a' togail thaighean-solais còmhla ris. **B' e innleadair ainmeil a bh' ann an Raibeart Stevenson, a thog co-dhiù 15 de na prìomh thaighean-solais agus a dh'innlich solais a dheigheadh air agus dheth.** Bha e cuideachd an sàs ann a bhith a' togail rathaidean-iarainn agus dhrochaidean. Lean cuid de mhic agus de dh'oghaichean e dhan dreuchd, a' dealbhachadh thaighean-solais do BTT gu 1938.

Chaidh a' chuid as motha de na taighean-solais eireachdail a chithear ann an Alba a thogail leis an teaghlach Stevenson.

B' e an sgrìobhadair, **Raibeart Louis Stevenson, fear eile dhen teaghlach ainmeil seo.** B' esan ogha an innleadair, Robert Stevenson. Bhiodh e a' siubhal còmhla ri a theaghlach gu iomadh taigh-solais iomallach, agus thathar ag ràdh gun do bhrosnaich na cuairtean seo leabhraichean a leithid Kidnapped agus Treasure Island. Bha e air leth moiteil às a theaghlach, agus sgrìobh e:

*“S gann gu bheil solas-mara eadar Eilean Mhanainn agus Bearaig a Tuath nach do dhealbhaich aon de mo chàirdean. Tha Taigh-solais Bell Rock na chuimhneachan air mo sheanair; An Sgeir Mhòr air bràthair m' athar; agus nuair a thig na solais air mu chladaichean Shealtainn, tha moit orm a' smaoinachadh gu bheil iad a' deàrrsadh gu soilleir air sàillibh sàr-ghineachas m' athar.”*

### Na h-Eileanan Flannach

**Chaidh aon de na taighean-solais as ainmeile – no as mì-chliùitiche – ann an Alba a dhealbhadh le Daibhidh Ailean Stevenson ann an 1899.** B’ e seo solas nan Eilean Flannach, air an Eilean Mhòr. Chan eil duine a’ fuireach air na seachd eileanan creagach seo, a tha nan laighe gu h-iomallach anns a’ Chuan Siar, mu fhichead mìle an iar air Eilean Leòdhais. **Ann an 1900, choisinn an t-àite droch chliù seach gun do chailleadh an triùir oifigear a bha an urra ris an t-solas, gun fhios aig duine dè a dh’èirich dhaibh. Chun an latha an-diugh, tha beachdan de gach seòrsa ann mu na thachair.**

Anns na làithean sin, bhiodh an luchd-obrach a’ fuireach air an taigh-sholais airson grunn sheachdainean. B’ e Seumas Ducat am prìomh oifigear air na h-Eileanan Flannach aig an àm, agus b’ e Tòmas Marshall a bha na neach-cuideachaidh. Bha Dòmhnall MacArtair – a bhiodh ann an-dràsta ’s a-rithist – còmhla riutha an àite cuideigin a bha bochd. B’ ann air an 26mh Dùbhlachd a fhuair a-mach nach robh sgeul orra, nuair a ràinig am bàta an Hesperus. B’ ise soitheach a bhiodh a’ frithealadh nan taighean-solais, agus nuair a chaidh na bh’ innte air tìr, thuig iad sa bhad gun robh rudeigin ceàrr. Cha robh sgeul air duine agus cha deach càil a sgrìobhadh anns an leabhar-aithris bhon 15mh Dùbhlachd. Cho-dhùin rannsachadh gun deach an sguabadh a-mach gu muir le tonn mòr a thàinig orra gun fhiosta.

Ann an 1912, rinn **Wilfrid Wilson Gibson**, Flannan Isle, pìos bàrdachd a tha ainmeil chun an latha an-diugh. Tha cuid dhen bheachd gur e na chuir e dhan bhàrdachd – agus nach robh buileach fìor – a dh’fhàg uimhir de dhaoine air am beò-ghlacadh leis an stòiridh agus a bhrosnaich a leithid de bheachdan mu na thachair, feadhainn dhiubh a’ buntainn ri co-fheall. Tha an naidheachd annasach seo air a bhith ann an iomadh sgeulachd is òran, agus tha e air fiù ’s nochdadh ann an geamannan bhidio agus opara.

Sguir na sgiobaidhean a’ dol dha na h-Eileanan Flannach ann an 1971, nuair a rinn iad an solas fèin-obrachail, mar iomadh taigh-solais eile air feadh an dùthcha. Tha a h-uile gin de phrìomh thaighean-solais BTT mar seo bho 1998.

## Loidhne-tìm

### Frise

Image not found

[https://www.go-to-the-future.eu/Fichiers/frises/171408frise\\_5\\_ga.png](https://www.go-to-the-future.eu/Fichiers/frises/171408frise_5_ga.png)

## Geamannan

Dealbhaich siostam-rabhaidh a dh’fhaodadh a bhith air a chleachdadh san latha an diugh, airson bàtaichean a chumail air falbh bho chladaichean

## Gnìomhan

1. Coimhead air mapa agus lorg na prìomh thaighean-solais timcheall oirthir na h-Alba.
2. Dèan rannsachadh air Call nan Eilean Flannach agus sgrìobh aithisg pàipear-naidheachd air a’ chuspair.

### 3. Sgrìobh stòiridh, stèidhichte air taigh-solais.

Image not found

<https://www.go-to-the-future.eu/Modules/fiches/images/footer-pdf.png>

